



**ЎЗБЕКИСТОН РЕСПУБЛИКАСИ НОМИДАН  
ҲАЛ ҚИЛУВ ҚАРОРИ**

**Гузор тумани 2022 йил 20 июль 4-1803-2202/737-сонли иш**

Гузор туманлараро иқтисодий судининг судьяси Н.С.Хўжақулов раислигида, судья ёрдамчиси Б.Шамсиддиновнинг котиблигида, аризачи [REDACTED] нинг, жавобгар [REDACTED] нинг банклардаги ҳисобварақлари бўйича операцияларни ўн кундан кўп муддатга тўхтатиб туриш тўғрисидаги аризаси бўйича ишни аризачи вакили А.Жумаев (20.07.2022 йилдаги 23-00521-сонли ишончнома асосида) иштирокида, Гузор туманлараро иқтисодий суди биносида очиқ суд мажлисида кўриб чиқиб, қуйидагиларни

**а н и қ л а д и:**

Аризачи [REDACTED] (бундан буён матнда аризачи) Гузор туманлараро иқтисодий судига электрон тарзда ариза билан мурожаат қилиб, жавобгар [REDACTED] нинг (бундан буён матнда жавобгар) банклардаги ҳисобварақлари бўйича операцияларини ўн кундан кўп муддатга тўхтатиб туришни сўраган.

Суд мажлисида иштирок этган аризачи вакили жавобгар томонидан бугунги кунда ҳисоботлар топширилганлигини маълум қилиб, бу тўғрисидаги маълумотномани судга тақдим қилиб, қонуний қарор қабул қилишни сўради.

Жавобгар [REDACTED] га суднинг аризани иш юритишга қабул қилиш ва ишни суд муҳокамасига тайёрлаш тўғрисидаги ажрими юборилган бўлиб, ажримни қабул қилиб олганлиги тўғрисидаги электрон почта хабарномаси судга келган бўлса-да, бироқ жавобгар узрсиз сабабларга кўра суд мажлисига иштирок этмади.

Суд, Ўзбекистон Республикаси Иқтисодий протцессуал кодексининг 128, 220-моддаларига асосан, ишни жавобгар вакилининг иштирокисиз кўриб чиқишни лозим топди.

Суд, аризачи вакилини кўрсатмаларини тинглаб, иш ҳужжатларини ўрганиб чиқиб, уларга ҳуқуқий баҳо бериб, қуйидаги асосларга кўра аризани қаноатлантиришни лозим топди.

Иш ҳужжатларидан кўринишича, жавобгар томонидан 2022 йил биринчи чорак учун фойда солиғи бўйича солиқ ҳисоботи белгиланган муддатда солиқ органига тақдим этилмаган.

Ўзбекистон Республикаси Солиқ кодексининг (бундан буён матнда СК) 82, 273-моддасида солиқ ҳисоботи солиқ тўловчи ҳисобга олинган



жойдаги солиқ органига белгиланган шаклда электрон ёки қоғоз шаклда солиқ ҳисоботига илова қилиниши лозим бўлган ҳужжатлар билан бирга тақдим этилиши белгиланган.

Аризачи томонидан мазкур солиқ ҳисоботларини топширишни сўраб 23.05.2022 йилда жавобгарнинг электрон манзилига хабарнома юборилган бироқ, юборилган хабарномага қарамасдан жавобгар томонидан солиқ ҳисоботлари белгиланган муддатда топширилмаган.

Шундан сўнг, аризачи томонидан 2022 йил 8 июнда 01-02218 -сонли қарор билан жавобгарнинг банклардаги барча ҳисобварақлари бўйича барча чиқим операциялари 10 кун муддатга тўхтатилган.

Аризачи жавобгарнинг банклардаги ҳисобварақлари бўйича операцияларни ўн кундан кўп муддатга тўхтатиб туриш тўғрисидаги Ғузор туманлараро иқтисодий судига ариза билан мурожаат қилган.

Ўзбекистон Республикаси Солиқ кодексининг 111-моддасига кўра, солиқ тўловчининг (солиқ агентининг) банкдаги ҳисобварақлари бўйича операцияларни тўхтатиб туриш тўғрисидаги қарор солиқ органининг раҳбари (раҳбар ўринбосари) томонидан ўн кундан кўп бўлмаган муддатга қабул қилиниши мумкин. Солиқ тўловчининг (солиқ агентининг) банкдаги ҳисобварақлари бўйича операцияларни ўн кундан кўп муддатга тўхтатиб туриш тўғрисидаги қарор солиқ органининг илтимосномасига асосан суд томонидан қабул қилиниши мумкин. Бунда солиқ тўловчининг (солиқ агентининг) банк ҳисобварақлари бўйича операциялари суд томонидан қарор қабул қилингунга қадар тўхтатиб турилади.

Солиқ тўловчининг (солиқ агентининг) банкдаги ҳисобварақлари бўйича операцияларни тўхтатиб туриш тўғрисида қарор электрон шаклда солиқ органи томонидан банкка юборилади. Бир вақтнинг ўзида солиқ органи томонидан солиқ тўловчининг шахсий кабинетига унинг банкдаги ҳисобварақлари бўйича операциялар тўхтатиб турилиши тўғрисида хабарнома бунинг сабабларини кўрсатган ҳолда юборилади.

Солиқ тўловчининг (солиқ агентининг) банкдаги ҳисобварақ бўйича операцияларнинг тўхтатиб турилиши фуқаролик қонун ҳужжатларига мувофиқ биринчи навбатда кўрсатилган тўловларга, шунингдек қонун ҳужжатларига мувофиқ ундирувга йўл қўйилмайдиган банклардаги ҳисобварақларга татбиқ этилмайди.

Суд мажлиси муҳокамасига аризачи вакили томонидан тақдим қилинган маълумотномада, жавобгар томонидан бугунги кунда барча солиқ ҳисоботлари топширганлиги сабабли, аризани қонуний тартибда кўриб чиқиш сўралган.

Юқоридагиларга кўра, суд аризани рад қилишни, ҳуқуқий таъсир чораларини қўллаш тўғрисидаги ишлар бўйича тарафлар давлат божи тўлашдан озод этилганлиги сабабли давлат божи ундирмасликни лозим топди.

Ўзбекистон Республикаси Иқтисодий процессуал кодексининг 176-179, 186, 221, 222-моддаларини қўллаб, суд

### **қ а р о р   қ и л д и :**

Аризачи [REDACTED] инг,  
жавобгар [REDACTED] нинг банклардаги



ҳисобварақлари бўйича операцияларни ўн кундан кўп муддатга тўхтатиб туриш ҳақидаги аризасини қаноатлантириш рад қилинсин.

Мазкур ҳал қилув қароридан норози томон ўн кунлик муддатда Ўзбекистон Республикаси иқтисодий процессуал кодексида белгиланган тартибда апелляция шикояти бериши (протест келтириш) мумкин.

**Судья**

**Н.С.Хўжақулов**

